

Pipoa diperluas ke negeri lain

Bantu tingkat pencapaian pelajar Orang Asli yang sederhana cemerlang

ROMPIN - Jabatan Kemajuan Orang Asli (Jakoa) Malaysia bercadang untuk meluaskan lagi projek Pusat Intelpek Pelajar Orang Asli (Pipoa) ke negeri lain dengan tujuan utama meningkatkan pencapaian pelajar Orang Asli yang sederhana cemerlang.

Pipoa yang pertama di negara ini ialah di Rompin telah beroperasi sejak 2012 dan kini menempatkan seramai 62 pelajar Orang Asli yang mana 70 peratus daripada mereka dijangka akan menyambung pelajaran ke Sekolah Menengah Sains atau Maktab Rendah Sains Mara selepas PMR pada tahun hadapan.

Ketua Pengarah Jakoa, Datuk Mohd Sani Mistam, berkata, Pipoa yang kedua adalah di Tok Jembal, Terengganu, dan kini dalam proses pembinaan.

"Pipoa yang sedang dibina di Tok Jembal ini akan merangkumi kawasan penduduk Orang Asli di Terengganu dan Kelantan.

"Konsepnya sama dengan Pipoa Rompin iaitu pelajar sederhana cemerlang yang terpilih akan tinggal di asrama Pipoa dan diberi kemudahan yang terbaik untuk meningkatkan prestasi mereka dalam pelajaran," katanya yang ditemui selepas merasmikan Pejabat Pelajar Orang Asli (Pipoa) dan Jakoa Rompin di pekarangan Pipoa Rompin, semalam.

Menurutnya, kebiasaannya pelajar Orang Asli yang cemerlang akan dihantar ke sekolah Sains dan Pipoa ini adalah peluang disediakan untuk mereka bagi yang sederhana cemerlang.

Menurutnya, pelajar Pipoa



Mohd Sani merasmikan Pejabat Pentadbiran Pipoa dan Jakoa Rompin, semalam.

juga akan bersekolah di sekolah terpilih di daerah tersebut dan segala kemudahan disediakan

seperti bas untuk mereka pergi dan balik dari sekolah.

"Kerjasama antara Jakoa

dan pihak pendidikan memang wujud sejak dari tahun 1996 iaitu pada tahun tersebut

Jakoa telah menyerahkan kuasa untuk mengurus hal pendidikan Orang Asli kepada Kementerian Pelajaran.

"Selain itu, di asrama Pipoa sendiri juga ada menyediakan kemudahan seperti kelas tuisyen sebagai persediaan menghadapi peperiksaan PMR," katanya.

Menurut Mohd Sani, konsep belajar secara berkumpulan dan tinggal di asrama yang teratur serta berjadual ini sudah pasti mampu meningkatkan pencapaian pelajar-pelajar Orang Asli ini.

Bagaimanapun menurutnya, jika pelajar Orang Asli yang tinggal di Pipoa tidak mendapat keputusan cemerlang dalam PMR, pelajar tersebut masih mempunyai peluang untuk ke institusi pelajaran lain seperti Kolej Vokasional dan sebagainya.